

ki yag, nashti lyakovinen les. A tu ka lyakovines les. Leste si o baro bakshishi. Ov ka del tut love, pe raklya, pe trine raklyan ka del tut, tu nanay te les. Tu ka manges lestar o bakshishi, ov si ko dvoros. Tu ka phires ande ko dvoros, ka dikhes les.

O raklo sovela, taman sabayle o raklo phutardas pe yakha. Phutardas pe yakha o rakloro i dinyas pes gogi.

– Thyu, anaswnw siktimini! Mange dori ande suno alo. Ach te dikhav.

Kay so te dikhel, anglal leste o dzhukel kirnilo kokalen. Lyas e kokale, gelo kindyas duy angalya kasht, thovdyas yag. Thovdyas len, phabardyas len, thabile e koalya. Liyas mardyas, mardyas len, kerdyas prahos. Khedindyas les ekh kotoreste, phanlyas les, thovdyas les pi poski. Chektinel, gelo dzhi kay gelo, varmo-chokmo, shov chhon drom dzhi khay reslo gadava thagareskoro khereste. Kindyas peske ekh doktorsko manto, uravdyas.

– Doktoras siyom, dortoras siyom.

Shundilo dzhi ko thagareskoro hanamikos. Topur, topur, topur gelo dzhi pash ko thagar.

– Thagarala, dzhi ko thagaripe tuke doktoras avilo. Nakhel te chhingardyav les.

– Chhingar les.

Chhingarde o chhaores.

– Selyam be, devla baba!

– Aleyki selyam be, evlyaden! Shay tu man mozhines te lyakovines?

– Shay me tut mozhe te lyakovina, ama ka keras amari arli tusa. Me tut ka lyakovina, no me so reshinav, gadava ka lav tutar.

– Ovel, evlyadi.

Shtrap, inkaldyas o rakloro samo leske ekh yakh, shtrap i kay nashti dikhelas, kay chhordzholas, sasti nanay sasti.

– Oh, aman be, devla! Me dori dikhava! Nito dukhal ma, nito nishto.

– Thagara, so phenlyan? Me tryabva te phirava ma ko dvoro. So ka reshinav, gadava ka lav.

– Novel, evlyadwn.

O chhavo hulistilo ko dvoros, so te dikhel – ekh ayroplanos. Irisaylo:

– Thagarala, ko thagaripe tuke! M ebendim o ayroplanos. Ako tu desa ma o ayroplanos me ka lyakovinav tu, ako na desa man me ka dzha mange.

– Novel, evlyadwn! Valla-billya me tut ka da o ayroplanos.

Lel o raklo, phutardas o ayroplanos. So te dikhel andre – opas o ayroplanos gavle, opash o ayroplanos pherdo rup. So te kerel o raklo?